

## Գ Լ ՈՒ Խ Ժ Է .

Արշաւանք Խաչակրաց յարեւելս : Պատերազմ նոցա 'ի կողմանս Բիւթա-  
նիոյ : Պաշարումն Անտիքայ և առումն նորին : Տիրել նոցին Ռեմէի ,  
Բեթղէհէմի : Պաշարել զԵրուսաղէմ և առնուլ զայն : Կատարումն այլազ-  
գեաց : Գրիգոր վկայասէր :

**Յ**ԵՏ այնչափ անհնարին աղէտից , սոսկալի կոտորածոց  
և մոլեգին արիւնհեղութեանց , ապառուժ և դժնդակ գե-  
րութեանց և յափշտակութեանց , զորս գործեցին յարե-  
ւելս եւ յաշխարհին Պաղեստինոյ ընդդէմ քրիստոնէից  
այլ և այլ իշխանական ցեղք Հապարացոց . հուսկ ուրեմն  
հայեցաւ Տէր 'ի ժողովուրդս իւր , և զարթոյց զմիտս քրիս-  
տոնէիցն Եւրոպիոյ փրկել զնոսա 'ի ձեռաց նեղչացն :

Վասն այսորիկ կազմեցաւ միաբանութիւն ինչ հոգեւոր  
յարեւմուտս 'ի մէջ Լատինացոց յորդորանօք Ուրբա-  
նոսի Բ . հայրապետին Հռոմայ , և քարոզութեամբ Պետ-  
րոսի ուրումն մեծի միայնակեցի՝ վասն ազատութեան  
Ս . Երկրին եւ բովանդակ սահմանաց նորին 'ի ձեռաց այ-  
լազգեաց : Եւ միաբանութիւն նոցա կոչեցաւ Խաչակրաց ,  
զի որք միանգամ մտանէին 'ի համար նոցա , կրէին յաջոյ  
ուսս իւրեանց զկարմրեբանդ նշան Ս . Խաչին ( 1095 ) :  
Ապա 'ի մի վայր եկեալ ժողովեցան բազմութիւնք յոյժ  
քրիստոնէից յիտալիոյ , 'ի Գաղղիոյ , 'ի Սպանիոյ , 'ի Գեր-  
մանիոյ եւ յայլ կողմանց Եւրոպիոյ , զորս 'ի հասարակի  
կոչեմք Լատինս կամ Խաչակիրս , որոց ամենեցուն զլուխ  
և զօրավար եկաց իշխանն քաջազօր Կոնդուպլէ , ընդ նմա  
էին Բալտովին կամ Բետուէն եւ Եւստաքէոս հարազատք  
նորին . Տանկրէտ և Ռէյմօնտ կոմսքն Ֆիլանտրիոյ և Նոր-  
մանտիոյ . Սինկեզ և միւս Պալտովին , և այլք :

Պետրոս միայնակեացն երթայր յառաջոյ Ասպետացս  
գաւազանաւ ուխտաւորութեան իւրոյ : Էին ընդ նոսա և  
բազմաթիւ եպիսկոպոսունք , քահանայք և պաշտօնեայք  
եկեղեցւոյ . եւ ձանապարհ արարեալ ահագին բազմու-  
թեամբ խաղացին ընդ Սրեւելս . անցեալ յաշխարհն Հուն-  
գարիոյ և Պոլսլարիոյ հասին 'ի դրունս Կոստանդինուպոլսի :